



Fegl d'infurmaziun: Applitgar l'artitgel 9 LMEIA (artitgel OSS)

Dapi il 1. da schaner 2024 è en vigur la nova [Lescha federala davart l'utilisaziun da meds electronics per ademplir las incumbensas da las autoritads \(LMEIA\)](#). Ella prescriba che las autoritads federalas ston publitgar il code da funtauna da las softwares, ch'ellas sviluppan u laschan sviluppar. Excepziuns èn pussaivlas, sch'ils dretgs da terzas personas u motivs relevants per la segirezza sclaudan u restrenschan quai.

Quest document è in agid per manadras e manaders da project u per autras personas responsablas per l'acquisiziun da softwares.

Dumondas inizialas:


Cumpra u dovra l'autorità federala ina software da standard senza adattaziuns?

→ Sche gea, guardar a)

u

Sto l'applicaziun d'ina software u ina componenta vegnir sviluppada aposta per la Confederaziun (software individuala)?

→ Sche gea, guardar b)



a) Acquisiziun e diever da softwares da standard

Sche la Confederaziun cumpra ina software senza adattaziuns, na vala l'artitgel 9 LMEIA betg. Mintga autorità federala è libra da cumprar e duvrar ina open source u in'otra software. In agid per l'acquisiziun da softwares porscha la pagina d'internet da l'[Uffizi federal per edifizis e logistica \(UFEL\)](#).

b) Creaziun u ulteriur svilup da softwares

Sch'ina autorità federala sviluppa sezza u lascha sviluppar softwares tras terzas personas, sto ella applitgar l'artitgel 9 LMEIA (artitgel OSS). Quai vala er per softwares che vegnan svilupadas vinavant en il rom d'ina contribuziun en projects OSS existents. Ad ina publicaziun dal code da funtauna s'opponan mo dretgs da terzas personas u motivs relevants per la segirezza. Per verifitgar quai emplen per plaschair la glista da controlla [Checkliste Em002-2.1 Vorabklärung](#).

Avis: Questa glista da controlla serva er sco motivaziun, pertge ch'ina software na sto betg vegnir publitgada. Perquai èsi impurtant da la consultar uschè baud sco pussaivel en il project. En il mussavia [Em002-2](#) vegn descrit l'entir process.

Autras dumondas da sclerir èn:

- **Sut tge licenza d'open source vegn la software publitgada?**

Ins sto sclerir la dumonda da princip, sche la software vegn publitgada sut ina licenza copyleft (en quest cas è p.ex. AGPL V3 ina buna tscherna) u en moda permissiva (p.ex. sut ina licenza MIT). Areguard la tscherna da la licenza furnescha il mussavia [Em002-3](#) infurmaziuns pli detagliadas. Per verifitgar quai emplen per plaschair la glista da controlla [Checkliste Em002-2.2 Analyse und Aufbereitung](#).

Avis: En il cas ideal vegn quella emplenida dal manader da project (tecnic) u da l'architecta IT.

- **Nua e co duain la software e tut ils artefacts correspondents vegnir publitgads?**

Per verifitgar quai emplen per plaschair la glista da controlla [Checkliste Em002-2.3 Freigabe und Publikation](#).

Avis: Qua vegni descrit en moda generala, nua e co che las softwares vegnan publitgadas. Eventualmain ston ins anc involver auters posts.

- **Duain ins crear ina community OSS?**

En il mussavia [Leitfaden Em002-4](#) vegnan ils avantatgs e las incumbensas per crear ina community OSS descrits en in concept.


Sche gea: Emplen la glista da controlla [Checkliste Em002-4.1 OSS-Community](#) che infurmescha davart il tip e davart la plattform giavischada per la community.

Avis: Il team da project ha qua ina gronda libertad da decider, sche e tge tip da community che duai vegnir creà. Eventualmain ston ins anc involver auters posts.

Respundai questas dumondas e verifitgai regularmain (circa ina giada per onn), sch'igl ha dà midadas essenzialas.

Mintga autoritad federala (p.ex. uffizi, unitad administrativa), che sviluppa u lascha sviluppar softwares, è sezza responsabla per la publicaziun.

Survista dals meds auxiliars



Il med auxiliars èn publicgads sin la pagina d'internet da la Chanzlia federala [Meds auxiliars OSS \(en tudestg\)](#). Ultra da quai èn els publicgads [en englais sin Github](#). Là pudais Vus dar directamain in resun.

En cas da dumondas contactai per plaschair: opensource@bk.admin.ch.